

REPOBLIKAN'I MADAGASIKARA
Fitiavana-Tanindrazana-Fandrosoana

Faritra : Atsimo Atsinanana

Distrika : Farafangana

Kaominina : _____

Ireo mpanolo-tsaina kaominaly

**Fitsipika mifehy ny fampiasàna ny foto-drafitr'asa rano fisotro madio fidiovana fanadiovana eo
anivon'ny kaominina**

- Araky ny lalàm-panorenana;
- Araka ny lalàna fehizoro laharana faha 2014-018 tamin'ny 12 Septambra 2014 mifehy ny tandrifim-pahefana ny fombafomba fandaminana sy ny fomba fiasan'ny vondrombahoakam-paritra itsinjaram-pahefana ary ny fitantanana ny raharahany manokana ;
- Araka ny lalàna laharana faha 2014-020 tamin'ny 27 Septambra 2014 mikasika ny loharanom-bolan'ireo vondrombahoakam-paritra itsinjaram-pahefana, ny fombafomba fifidianana, ny fandaminana sy ny fomba fiasa ary ny anjara andraikitry ny rafitr'izy ireo ;
- Araka ny lalàna laharana faha 2014-021 tamin'ny 12 Septambra 2014 mikasika ny fisoloantenam-panjakana
- Araka ny didim-panjakana laharana faha 2014 – 1929 tamin'ny 23 Desambra 2014 ampiharana ny lalàna laharana faha 2014-021 tamin'ny 12 Septambra 2014 mahakasika ny fisoloatenam-panjakana
- Araka ny didim-panjakana laharana faha 2015-592 tamin'ny 01 Aprily 2015 izay mitsinjara ireo kaominina ho ambonivohitra sy ambanivohitra.
- Araka ny didim-panjakana laharana faha 2015-593 tamin'ny 11 Janoary 2015 namoronana ireo fari-piadidim-panjakana anapariaham-pitondrana
- Araka ny didim-panjakana laharana faha 2015-980 tamin'ny 16 Jiona 2015 mamaritra ny anjara andraikit'ireo lehiben'ny mpanatanteraka ao amin'ireo vondrom-bahoakam-paritra itsinjaram-pahefana
- Araka ny fanambarana tamin'ny fomba ofisialy izay nosoniavin'ny Praiministra lehiben'ny governemanta sady minisitry ny fahasalamam-bahoaka tamin'ny 17 Jolay 2014 tasa teo tao amin'ny carlton Antananarivo fa miady amin'ny fangerena an-kalamanjana ny fanjakana Malagasy ho fitandroana ny fahadiovana sy ny fahasalamana
- Araka ny fanambarana ampahibemaso nataon'ny lehiben'ny faritra Atsimo Atsinanana tamin'ny 26 Aogositra 2014 tao Farafangana fa miady amin'ny fangerena an-tonda sy an-joloky ihany koa ny vahoakan'ny faritra Atsimo Atsinanana manontolo ;
- Araka ny lalàna laharana faha 98-029 tamin'ny 20 Janoary 1999 mahakasika ny lalàna mifehy ny rano.
- Araka ny didim-panjakana laharana faha 2004-635 tamin'ny 15 Jiona 2015 izay manova ny didim-panjakana laharana faha 2003—941 tamin'ny 09 Septambra 2003 mahakasika ny fanaraha-maso ny kalitaon'ny rano ho sotroina sy ny maha-laharam-pahamehana ny fahazoan-drano fisoitro madio.
- Araka ny didim-panjakana laharana faha 2015-093 tamin'ny 10 Febroary 2015 mamaritra ny andraikitrin'ny ministry ny rano fidiovana fanadiovana sy ny fandaminana ny ministera sahaniny

Ny Ben'ny tanàna dia namolavola izao hevitra manaraka izao:

Andininy 1 : Ny kaominina no tompon'ny foto-drafitr'asa fahazoan-drano fisotro madio sy ny fanadiovana ao amin'ny taniny ary mamindra ny fitantanana amin'ny komitin'ny rano.

Andininy 2 : Andraikitrin'ny STEAH

- a) Ny STEAH no miandraikitra ny fitantanana mangarahara ataon'ny komitin'ny rano sy miaro ny fanodikodinam-bola rehetra amin'ny alalan'ny fanaraha-maso ny asan'ireo komity sy ny fandaniana izay nataony.
- b) Ny STEAH no miantoka ny fahazoan-drano fisotro madio maharitra amin'ny fanaovany ny fitsidihana ny foto-drafitr'asa sy ny fikojakojana.

Andininy 3 : Ankoatran'ny vola halefa eny amin'ny kaominina, ny komity dia tsy maintsy manao ny vinavinam-pandaniana isan-taona miaraka amin'ny ben'ny rano mba hitantanana sy hikojakojana ny foto-drafitr'asa. Io vinavinam-pandaniana io dia tsy maintsy ambara amin'ny favoriambem-pokonolona no sady ankatoavin'izy ireo ary farany dia ankatoavin'ny ben'ny rano.

Andininy 4 : Ny komity amin'ny alalan'ny latsak'emboka ataon'ny fokonolona dia mandrotsaka vola isan-taona eny amin'ny kaominina mba hampandehanana ny STEAH. Ny famaritana ny vola harotsaka eny amin'ny kaominina dia hanaovana taratasy fanapahana manokana.

Andininy 5 : Ny vola miditra sy mivoaka rehetra ao amin'ny komitin'ny rano dia tsy maintsy misy taratasy fanamarinana : faktiora, rosia, sonia na lavo-tondro indrindra ho an'ireo mpandrotsa-bola ao anatin'ny kahiean'ny mpitam-bola. Ireo taratasy fanamarinana sy ny kahiean'ny mpitam-bola dia tsy maintsy aseho ny ben'ny rano amin'ny fotoana hanaovany fitsidihana mba ahafahany mametraka sy manamarina ny toe-bola faran'ny komitin'ny rano.

Andininy 6 : Ny komitin'ny rano dia mitazona ny endrikin'ny foto-drafitr'asa arak'izay nanolorana azy tamin'ny famindram'pitantanana nataon'ny kaominina tamin'izy ireo raha tsy hoe nisy toro-marika manokana sy ara-dalàna avy amin'ny tompon'ny foto-drafitr'asa (kaominina). Raha misy fanamboarana ny foto-drafitr'asa, ny komitin'ny rano dia tsy maintsy mampilaza ny kaominina ary manomana ny fanamboarana miaraka amin'ny Ben'ny rano.

Andininy 7 : Ny tanàna rehetra izay manana kabone dia tsy maintsy mampiasa izany, mikojakoja ary manamboatra rehefa ilaina izany na amin'ny alalan'ny toro-marika omen'ny STEAH (ben'ny rano).

Andininy 8 : Ny tsy fanajàna ireo andiny voalaza etsy ambony ireo dia mahavoan'ny sazy izay ampiharin'ny kaominina ary mety hitarika hatrany amin'ny fanapahana ny rano raha miverimberina matetika izany.

Andininy 9 : Ireo fihetsika mahavoa sazy sy ny sazy hampiharina :

- Ny fampiasan-drano ankoatran'ny rano ho sotroina toy ny fanamboarana trano, ny fanondrahana voly sns hafa : Ny komitin'ny rano dia tsy maintsy mangataka sy mahazo ny fankatoavana avy amin'ny STEAH vao afaka mampiasa ny rano ankoatran'ny ho sotroina. Raha mahazo ny fankatoavana avy amin'ny STEAH, ny komity dia afaka mametraka saran'ny rano ho 100 Ar ny bidon 20l.
- Ny fangalarana, ny fanimbana niniana natao na fanapotehana ny foto-drafitr'asa (vovon-drano, paompy, valan'ny paompy) : Ny komitin'ny rano dia tsy maintsy mampahafantatra faran'izay haingana ny kaominina ary mametraka fitarainana eo anivon'ny STEAH. Aorian'izay ny mpanao asa ratsy dia manonitra ny zavatra nosimbany ary voan'ny **DINA 30 000Ar** no sady atolotra ny manam-pahefana tompon'andraikitra (*cf Dinam-paritra atsimo Atsinanana andininy faha-17 “fanimbàna fananam-panjakana” tamin’ny 22 Mai 2015*).
- Ny tsy fikojakojana ny foto-drafitr'asa paompy sy kabone : aorian'ny fifampiresahana amin 'ny fokonolona, ny kaominina dia mananjo ny hanapaka ny rano mandra-pilamin'ny toe-draharaha. Raha sanatria ka tsy voavaha ny olana na dia efa misy aza ny ezaka ataon'ny komitin'ny rano, ny komity dia afaka manapaka ny rano ihany koa.
- Ny endriky fandotoana sy ny tsy fanadiovana (tay miparitaka): Ny kaominina dia manapaka ny rano mandra-pilamin'ny toe-draharaha ka tsy mihoatra ny folo andro (10 andro) ny fetr'andro fanadiovana ny maloto. Raha

tsy voahaja io fe-potoana io dia mihatra ny Dina **30 000Ar** miampy asa fanadiovana mandritra ny iray andro (*cf Dinam-paritra atsimo Atsinanana andininy faha-28 “ny amin’ny fanadiovana” tamin’ny 22 Mai 2015*).

Raha misy vola azo avy amin’ny sazy arotsaka ao amin’ny komitin’ny rano, io vola narotsaka io dia tsy maintsy misy taratasy fanamarinana ary ahitana ny zavatra natao sy ny vola mifandraika amin’izany ka ny fomba fizara azy dia efa voafaritra ao amin’ny dinam-paritra.

Andininy 10 : Ny kaominina amin’ny alalan’ny STEAH dia tsy maintsy manao ny fanaraha-maso ny kalitaon’ny rano indray mandeha isan-taona indrindra fa ny afaran’ny loza voajanahary ka ny santionan-drano dia aterina eny amin’ny DREAH ao anatin’ny valo amby efapolo ora (48 ora).

Andininy 11 : Famahana ny olana: Raha sendra misy ny olana eo amin’ny STEAH sy ny fokonolona dia ny kaominina no mandamina ary raha olana eo amin’ny kaominina sy ny STEAH ary ny komitin’ny rano dia ny Talem-parity ny rano sy ny distrika no manelanelana. Ny fitsarana eo an-toerana no mahefa raha mbola tsy voavaha ny olana.

Andininy 12 : Ireo fanapahan-kevitra ireo dia mihatra avy hatrany rehefa vita fampahafantarana ny rehetra na ny komitin’ny rano na ny mpahazo tombotsoa mivantana amin’ny foto-drafitr’asa rano fisotro madio.

Natao teto _____, ny _____ 2016

Ny ben’ny tanàna

Ny filohan’ny mpanolo-tsaina